

# ZAKON O GRANIČNOJ POLICIJI BOSNE I HERCEGOVINE

SL. GLASNIK BiH, broj: 50/04, 27/07 i 59/09

## **PREČIŠĆENI TEKST**

*-Ovo je neslužbena prečišćena verzija navedenog zakona, što je potrebno imati u vidu pri njegovom korištenju*

### I - OPJE ODREDBE

#### Član 1.

##### *Djelokrug propisivanja*

- (1) *Ovim zakonom propisuju se nadležnost, organizacija i upravljanje Graničnom policijom Bosne i Hercegovine (u daljem tekstu: GPBiH) kao policijskim organom Bosne i Hercegovine (u daljem tekstu: BiH), kao i druga pitanja značajna za funkcioniranje GPBiH.*
- (2) *Na sva ostala pitanja značajna za djelovanje GPBiH kao policijskog organa, u mjeri u kojoj nisu propisana ovim zakonom, primjenjuje se Zakon o policijskim službenicima Bosne i Hercegovine, Zakon o Direkciji za koordinaciju policijskih tijela i agencijama za podršku policijskoj strukturi Bosne i Hercegovine, Zakon o nezavisnim i nadzoranim tijelima policijske strukture Bosne i Hercegovine («Službeni glasnik BiH», broj 36/08) i drugi odgovarajući zakoni koje u svom radu primjenjuje GPBiH.*
- (3) *Na sva pitanja organizacije i upravljanja, te druga pitanja značajna za funkcioniranje GPBiH kao upravne organizacije, kao što je donošenje Pravilnika o unutrašnjoj organizaciji (u daljem tekstu: Pravilnik) i drugih propisa, upravni nadzor, odnos između institucija BiH, te odnos prema pravnim i fizičkim osobama, u mjeri u kojoj nisu propisana ovim zakonom, primjenjuje se i Zakon o ministarstvima i drugim organima uprave Bosne i Hercegovine («Službeni glasnik BiH», br. 5/03, 42/03, 26/04, 42/04, 45/06, 88/07 i 35/09) i Zakon o upravi («Službeni glasnik BiH», br. 32/02).*

#### Član 2.

##### **Definicija GPBIH-a**

- (1) GPBIH je upravna organizacija u okviru Ministarstva sigurnosti BiH (u daljem tekstu: Ministarstvo), s operativnom samostalnošću, osnovana radi obavljanja policijskih poslova vezanih za nadzor i kontrolu prelaska granice BiH (u daljem tekstu: državna granica), i drugih poslova propisanih zakonom.

(2) GPBIH djeluje isključivo na profesionalnim osnovama i ne zastupajući, ne štiteći niti podrivajući interese bilo koje političke stranke, registrirane organizacije ili udruženja, ili bilo kojeg konstitutivnog ili drugog naroda u BiH.

### Član 3.

#### ***Sjedište i budžet GPBiH***

- (1) Sjedište GPBIH je u Sarajevu.
- (2) GPBIH se finansira iz Budžeta institucija Bosne i Hercegovine i međunarodnih obaveza Bosne i Hercegovine.

### Član 4.

#### ***Radni odnosi u GPBiH***

- (1) *Zaposleni u GPBiH su: policijski službenici, državni službenici, zaposlenici i ostali zaposleni u skladu s Pravilnikom.*
- (2) Policijski službenici su ovlaštene službene osobe čiji je radni odnos reguliran Zakonom o policijskim službenicima Bosne i Hercegovine.
- (3) Radni odnosi državnih službenika koji rade u GPBIH uređuju se Zakonom o državnoj službi u institucijama Bosne i Hercegovine.
- (4) *Radni odnosi zaposlenika u GPBiH uređuju se Zakonom o radu u institucijama Bosne i Hercegovine («Službeni glasnik BiH», br. 26/04, 7/05 i 48/05).*
- (5) *Radna mjesta na kojima rade policijski i državni službenici, zaposlenici, te ostali zaposleni uređuju se Pravilnikom.*

### Član 5.

#### **Policijska ovlaštenja**

Policijski službenici zaposleni u GPBIH primjenjuju policijska ovlaštenja u skladu sa Zakonom o policijskim službenicima Bosne i Hercegovine i postupaju kao ovlaštene službene osobe u skladu sa zakonima o krivičnom postupku BiH (u daljem tekstu: Zakon o krivičnom postupku).

### Član 6.

#### **Nacionalna zastupljenost u GPBiH**

Struktura policijskih službenika, državnih službenika, *zaposlenika* i ostalih zaposlenika u GPBIH općenito odražava nacionalnu strukturu stanovništva BiH prema popisu stanovništva iz 1991. godine, u skladu sa sljedećim kriterijima:

1. Struktura glavnog ureda odražava nacionalnu strukturu stanovništva BiH kao cjeline.
2. Struktura terenskih ureda i jedinica odražava nacionalnu strukturu stanovništva unutar njihovih područja odgovornosti.
3. Zastupljenost svakog od konstitutivnih naroda BiH na svim nivoima ne može biti ni u kom slučaju veća od 2/3, ni manja od 1/10 od ukupnog broja osoblja GPBIH. Ova odredba ne odnosi se na zastupljenost ostalih koji, u svim slučajevima, imaju pravo na zastupljenost prema popisu stanovništva iz 1991. i gore navedenim kriterijima.
4. Sve jedinice GPBIH u potpunosti su mješovitog nacionalnog sastava i svi pripadnici mogu obavljati dužnosti na svakoj tački duž granice.

## II - NADLEŽNOST I POSLOVI GPBIH-a

### Član 7.

#### **Nadležnost GPBIH-a**

Poslovi iz nadležnosti GPBIH-a su:

1. Provođenje odredbi Zakona o nadzoru i kontroli prelaska državne granice kako je propisano tim zakonom;
2. Provođenje odredbi Zakona o kretanju i boravku stranaca i azilu kako je propisano tim zakonom;
3. Sprečavanje, otkrivanje i istraživanje djela koja su propisana krivičnim zakonima u Bosni i Hercegovini kada:
  - a) su ta krivična djela usmjerena protiv sigurnosti državne granice ili protiv izvršenja poslova i zadataka iz nadležnosti GPBIH; ili
  - b) se ta krivična djela moraju goniti u skladu s odredbama o zloupotrebi javnih isprava koje služe kao dokaz identiteta, o putnoj ispravi i obavezi posjedovanja vize, te odredbama o kretanju i boravku stranaca i azilu ukoliko su počinjena prilikom prelaska granice ili su direktno vezana za prelazak državne granice; ili
  - c) ta krivična djela obuhvataju prijevoz robe preko državne granice čiji promet nije dopušten, robe bez službenog odobrenja ili u slučaju kršenja važeće zabrane, ukoliko je

GPBIH dodijeljena dužnost nadziranja takvog odobrenja i zabrane na osnovu drugog propisa ili administrativnog sporazuma s organom odgovornim za takvo gonjenje.

4. Sprečavanje, otkrivanje i istraživanje drugih krivičnih djela na zahtjev nadležnog organa;
5. Sprečavanje, otkrivanje i istraživanje:
  - a) prekršaja koji su propisani Zakonom o nadzoru i kontroli prelaska državne granice, Zakonom o kretanju i boravku stranaca i azilu, te drugim zakonima, ili
  - b) drugih prekršaja na zahtjev nadležnog organa;
6. Pružanje policijske ispomoći organizacijskim jedinicama u sklopu Ministarstva sigurnosti u provođenju Zakona o kretanju i boravku stranaca i azilu i drugih važećih propisa iz ove oblasti.
7. Poduzima mjere zaštite zračnog civilnog saobraćaja i sigurnosti prostorija međunarodnih aerodroma u BiH;
8. Osigurava svoje organizacijske jedinice od opasnosti;
9. Daje stručno mišljenje pravosudnim organima ili drugim institucijama na njihov zahtjev, a vezano za vjerodostojnost dokumenata koji su korišteni ili su se namjeravali koristiti za prelazak državne granice. Takvi dokumenti uključuju putne dokumente, dokumente za ličnu identifikaciju i bilo koje druge dokumente koji su vezani za kretanje osoba, vozila ili roba preko državne granice.
10. Izvršava i druge poslove propisane zakonom i drugim propisom.

#### Član 8.

#### **Područje odgovornosti GPBIH-a**

- (1) Pri izvršavanju nadležnosti propisanih u tački 1. člana 7. ovog zakona, GPBIH je nadležan za djelovanje unutar zone koja se proteže do deset kilometara od državne granice.
- (2) Izvršenje nadležnosti GPBIH navedeno u tački 1. člana 7. ovog zakona može se proširiti van zone propisane u stavu 1. ovog člana, ako se takve nadležnosti provode na vozovima, letjelicama, plovilima.
- (3) GPBIH je ovlašten za izvršavanje nadležnosti navedene u tačkama 2., 3., 4., 5., 6. i 7. člana 7. ovog zakona unutar cijele teritorije BiH.

#### Član 9.

## **Postupak po krivičnim djelima i prekršajima u nadležnosti GPBIH-a i drugih organa**

(1) O krivičnim djelima i prekršajima koji ne potpadaju pod tačke 3., 4. i 5. člana 7. ovog zakona, GPBIH izvještava nadležne policijske organe i agencije za provođenje zakona u BiH o informacijama dobivenim tokom obavljanja svojih dužnosti. Svaka informacija i materijal, vezani za krivično djelo ili prekršaj, uključujući informacije vezane za mjere i aktivnosti poduzete s ciljem sprečavanja činenja i nečinjenja ili lociranja i hvatanja počinitelaca takvih djela, bez odgađanja predaju se nadležnom organu gonjenja.

(2) Osim poduzimanja mjera iz stava 1. ovog člana, GPBIH je obavezna poduzimati sve mjere koje moraju biti poduzete bez odgađanja kako bi se spriječilo prikrivanje i promjena informacija i materijala vezanih za krivično djelo ili prekršaj.

(3) Odredbe ovog zakona ne sprečavaju druge policijske organe i agencije za provođenje zakona da izvršavaju svoje nadležnosti unutar područja definiranih odredbama iz člana 9. ovog zakona.

(4) Kada se radi o krivičnim djelima ili prekršajima iz tačke 3., 4. i 5. člana 7. ovog zakona, policijski organi i agencije za provođenje zakona u BiH obavještavaju GPBIH o informacijama dobivenim u toku obavljanja svojih dužnosti. Svaka informacija i materijal, vezani za sumnju o krivičnom djelu ili prekršaju, uključujući informacije vezane za mjere i aktivnosti poduzete s ciljem da se spriječi činenje i nečinjenje ili da se lociraju i uhvate počinioci takvih djela, bez odgađanja se predaju nadležnom organu gonjenja.

### **III - ORGANIZACIJA I UPRAVLJANJE**

#### **Član 10.**

#### **Struktura**

(1) GPBIH je strukturirana s ciljem osiguranja koordinacije svih aktivnosti na centralnom, regionalnom i lokalnom nivou, tako da pruži visokospecijalizirane usluge potrebne za izvršenje zadataka iz svoje nadležnosti kao i da osigura dvosmjernu razmjenu informacija između centralnih, regionalnih i lokalnih nivoa organizacijskih jedinica.

(2) GPBIH se sastoji od sljedećih organizacijskih jedinica:

1. Glavni ured,
2. Terenski uredi,
3. Jedinice,

4. Centralni istražni ured,
  5. Specijalizirane jedinice,
  6. *Ostale organizacijske jedinice definirane Pravilnikom.*
- (3) Glavni ured sastoji se od Uprave za operacije, Uprave za administraciju i Odjela za unutarnju kontrolu.
- (4) Specijalizirane jedinice navedene u stavu 2. tačke 5. ovog člana su Jedinica za osmatranje i nadzor i Mobilna jedinica za podršku i kontrolu.
- (5) *Struktura GPBiH bit će detaljnije uređena Pravilnikom, u skladu s ovim zakonom.*

#### Član 11.

##### *Rukovođenje u GPBiH*

- (1) *GP-om BiH rukovodi direktor GPBiH (u daljem tekstu: direktor).*
- (2) *Direktor ima jednog zamjenika (u daljem tekstu: zamjenik direktora) i jednog pomoćnika direktora za organizaciju i operacije (u daljem tekstu: pomoćnik direktora), koji za svoj rad odgovaraju direktoru.*
- (3) Direktor ima čin glavnog generalnog inspektora.
- (4) *Direktor je za svoj rad i rad GPBiH odgovoran ministru sigurnosti i Vijeću ministara.*
- (5) *Direktor, zamjenik direktora i pomoćnik direktora ne mogu biti iz istog konsultativnog naroda.*

#### Član 12.

##### **Zamjenik direktora**

- (1) *Zamjenik direktora pomaže direktoru u obavljanju njegovih dužnosti, zamjenjuje direktora za vrijeme njegovog odsustva, obavlja pojedine dužnosti koje mu prenese direktor, te izvršava zaduženja koja mu, po potrebi, dodjeljuje direktor s ciljem efikasnog i pravilnog obavljanja poslova GPBiH.*
- 2) *Dužnosti i odgovornosti zamjenika direktora detaljnije se uređuju Pravilnikom.*

#### Član 13.

##### **Pomoćnik direktora i rukovodeći službenici organizacionih jedinica**

- (1) *Pomoćnik direktora rukovodi Glavnim uredom.*

(2) *Pomoćnik direktora i ostali rukovodeći službenici osnovnih organizacionih jedinica se postavljaju, imenuju, te im prestaje radni odnos u skladu sa Zakonom o policijskim službenicima i Zakonom o državnoj službi u institucijama Bosne i Hercegovine.*

(3) *Dužnosti i odgovornosti pomoćnika direktora i ostalih rukovodećih službenika organizacionih jedinica detaljnije se utvrđuju Pravilnikom GPBiH.*

(4) *Nakon isteka mandata pomoćnika direktora, policijski službenik koji je bio na takvom položaju raspoređuje se na položaj za koji je potreban čin glavnog inspektora.*

#### Član 14.

##### ***Imenovanje, razrješenje direktora i zamjenika direktora***

(1) *Direktora i zamjenika direktora imenuje Vijeće ministara, na prijedlog ministra, sa liste kandidata koju dostavi Nezavisni odbor, na mandat od četiri godine, uz mogućnost reimenovanja u drugom narednom mandatu.*

(2) *Savjet ministara razrješava direktora i zamjenika direktora prema uslovima i procedurama koje sprovodi Nezavisni odbor.*

(3) *Direktor i zamjenik direktora mogu biti razriješeni dužnosti prije isteka mandata:*

- a) na lični abtjev*
- b) ako mu je konačnom odlukom izrečena disciplinska mjera zbog učinjene teže povrede radne dužnosti*
- c) ako je osuđen za krivično djelo, osim za krivično djelo iz oblasti bezbjednosti saobraćaja*
- d) ako se utvrdi da je aktivan član političke partije*
- e) ako se na osnovu mišljenja nadležne zdravstvene ustanove utvrdi da je trajno spriječen da obavlja dužnost*

#### Član 15.

##### **Dužnost i odgovornosti direktora**

1) *Direktor:*

- a) predstavlja GPBiH*

- b) *izrađuje godišnji plan rada prema smjernicama i politikama koje utvrde predsjedavajući i zamjenici predsjedavajućeg Savjeta ministara, te nacrt godišnjeg budžeta GPBiH i predlaže ih ministru, koji ih prosjeđuje Savjeu ministara na usvajanje*
- c) *rukovodi i usmjerava obavljanje poslova iz nadležnosti GPBiH*
- d) *učestvuje u izradi planova aktivnosti kojim definiše pitanja i radnje koje treba da budu preduzete u vezi sa sprečavanjem ilegalnih migracija, kao i krivičnih djela i prekršaja iz nadležnosti GPBiH*
- e) *definiše operativnu strategiju za uspješan nadzor i kontrolu državne granice*
- f) *obezbjeduje pravilno izvršavanje smjernica i naloga tužioca o radnjama policijskih službenika u vezi s krivičnim postupkom*
- g) *obezbjeduje saradnju s agencijama za sprovođenje zakona, te osalim odgovarajućim organima u BiH*
- h) *obezbjeduje saradnju s organima za sprovođenje zakona i osalim nadležnim službama stranih država, kao i sprovođenje ostalih međunarodnih sporazuma u oblasti nadzora i kontrole prelaska državne granice, kao i drugih međunarodnih instrumenata koji se odnose na pitanja iz nadležnosti GPBiH*
- i) *predlaže nadležnom tijelu pokretanje pregovora vezanih za zaključivanje međunarodnih sporazuma o saradnji u vezi s pitanjima državne granice, uključujući sporazume o (re) admisiji*
- j) *vrši stalne analize, radi racionalnog rasporeda osoblja i tehničkih sredstava*
- k) *obezbjeduje primjenu i poštovanje utvrđenih standarda profesionalnih vještina i obuke za osoblje*
- l) *obezbjeduje da GPBiH uspješno primjenjuje odredbe Zakona o kretanju i boravku stanaca i azilu te obezbjeduje da osoblje GPBiH bude adekvatno obučeno u primjeni tog zakona.*

(2) *Uz dužnosti i odgovornosti iz stava (1) ovog člana direktor obavlja i druge poslove, kao što su:*

- a) *donošenje Pravilnika, uz saglasnost Savjeta ministara, kao i drugih propisa predviđenih zakonom koji su potrebni radi omogućavanja obavljanja poslova iz nadležnosti GPBiH*
- b) *raspoređivanje na dužnost pomoćnika direktora i imenovanje rukovodilaca organizacionih jedinica GPBiH u skladu sa zakonom, Pravilnikom i drugim propisima*
- c) *donošenje odluka o zapošljavanju, raspoređivanju i prestanku rada zaposlenih u GPBiH u skladu sa Zakonom o policijskim službenicima Bosne i Hercegovine i drugim zakonima i propisima*
- d) *sprovođenje aktivnosti za nabavku oružja i municije u saradnji s Agencijom za policijsku podršku, a uz saglasnost ministra*



- e) *spvođenje aktivnosti nabavke materijano-tehničkih sredstava, koja Savjet ministara nije propisao kao standardizovanu opremu*
  - f) *spvođenje aktivnosti u vezi s programom obuke i stručnog usavršavanja zaposlenih u GPBiH, a shodno Zakonu o Direkciji za koordinaciju policijskih tijela i Zakonu o policijskim službenicima Bosne i Hercegovine*
  - g) *podnošenje godišnjeg izvještaja o radu GPBiH ministru, koji ga prosleđuje Savjetu ministara, te posebnih izvještaja po potrebi ili na zahtjev ministra*
  - h) *podnošenje izvještaja Parlamentarnoj skupštini Bosne i Hercegovine, Savjetu ministara i Predsjedništvu Bosne i Hercegovine, na njihov zahtjev*
  - i) *obavljanje drugih dužnosti propisanih zakonom i drugim propisima.*
- (3) *Direktor je odgovoran za zakonitost rada GPBiH i za zakonito trošenje sredstava dodijeljenih GPBiH, iz Budžeta institucija Bosne i Hercegovine i međunarodnih obaveza Bosne i Hercegovine.*

#### Član 16.

#### ***Spriječenosť direktora***

- (1) *U slučaju spriječenosti direktora da ispunjava svoje dužnosti i odgovornosti, ispunajva ih zamjenik direktora, sve dok direktor ponovo ne bude u mogućnosti da ih preuzme, ili do imenovanja novog direktora.*
- (2) *Ako direktor ne može ponovo preuzeti svoje dužnosti i odgovornosti, savjet ministara imenovaće novog direktora u skladu s odredbama člana 12. ovog zakona.*

#### Čl. 17 (izbrisan)

### IV - SARADNJA

#### Član 18.

#### **Pružanje pomoći**

- (1) *Organi uprave i druga tijela, službe i druge institucije u BiH, entitetska i kantonalna ministarstva unutrašnjih poslova, carinske i porezne vlasti, finansijska policija, tijela za međunarodnu operativnu policijsku saradnju, nadležna tijela Brčko Distrikta BiH i druga odgovarajuća tijela dužna su sarađivati s GPBIH i, na njen zahtjev, pružiti pomoć GPBIH u*

obavljanju poslova iz njene nadležnosti te koordinirati djelatnosti iz svoje nadležnosti, u skladu sa zakonom i drugim propisima o zaštiti izvora, metoda i ostalih informacija.

(2) *GPBiH saraduje i pruža pomoć organima iz stava 1. ovog člana na njihov zahtjev.*

(3) Način pružanja pomoći i sva ostala pitanja vezana uz pružanje pomoći i saradnju iz st. 1. i 2. ovog člana uređuju se međusobnim sporazumom ili drugim pravnim aktom u mjeri u kojoj nisu utvrđena zakonom.

## Član 19.

### **Zadaci u slučaju vanrednih okolnosti**

(1) U slučaju da ozbiljna opasnost po opću sigurnost ili javni red, utvrđena od strane nadležnog organa, ili elementarna nepogoda, uzrokuje ozbiljne operativne poteškoće za GPBiH, a ukoliko su te poteškoće direktno vezane za uspješno obavljanje dužnosti GPBiH, GPBiH može zahtijevati podršku odgovarajućih nadležnih institucija, policijskih organa i agencija za provođenje zakona u BiH.

(2) Odluku o traženju podrške iz stava 1. ovog člana, na prijedlog direktora, donosi Ministarstvo u dogovoru s nadležnim agencijama za provođenje zakona u BiH, entiteta i Brčko Distrikta. Nadležne institucije, policijski organi i agencije uključene u podršku podređene su GPBiH i mjere koje poduzimaju predstavljaju mjere koje poduzima GPBiH. Dodatni troškovi koji nastanu takvim aktivnostima izmiruju se iz Budžeta institucija BiH i međunarodnih obaveza BiH, na osnovu posebne odluke Vijeća ministara.

(3) Odredbe iz ovog člana također se primjenjuju na pomoć koju GPBiH pruža drugim agencijama za provođenje zakona u BiH.

## Član 20.

### **Međunarodna saradnja GPBiH**

(1) *GPBiH saraduje sa stranim organima za sprovođenje zakona, drugim tijelima za međunarodnu operativnu saradnju s ciljem obavljanja poslova iz svoje nadležnosti po ovom zakonu. Takva saradnja može uključivati razmjenu podataka i zajedničko obavljanje poslova iz nadležnosti GPBiH.*

(2) *GPBiH može dostaviti stranim organima za provođenje zakona i drugim organima iz stava (1) ovog člana podatke o državljanima BiH, ukoliko primi obavještenje da državljanin predstavlja opasnost za sigurnost BiH, državu u kojoj se nalazi ili širu opasnost za regionalnu ili globalnu sigurnost.*

(3) *Saradnja sa stranim organima za sprovođenje zakona u krivičnim stvarima obavlja se preko Direkcije za koordinaciju policijskih organa BiH i drugih nadležnih organa i institucija BiH.*

- (4) GPBiH neće dostaviti podatke o državljanima BiH ako nema razumnu garanciju da će primalac obezbijediti isti nivo zaštite podataka koji se obezbjeđuje u Bosni i Hercegovini.
- (5) Ako se podaci odnose na krivični postupak koji se vodi u Bosni i Hercegovini, razmjena podataka iz ovog člana obavlja se u skladu sa zakonima o krivičnom postupku, Zakonom o zaštiti ličnih podataka («Službeni glasnik BiH», br.49/06) i Zakonom o zaštiti tajnih podataka («Službeni glasnik BiH», br. 54/05)
- (6) Međunarodna saradnja vezana za pitanja unutar GPBiH uređuje se kroz pisane bilateralne ili multilateralne sporazume ili protokole i može pokrivati sve aspekte prekogranične saradnje, uključujući analize zajedničkog rizika, razmjenu iskustava i saradnju u vezi sa istragama.
- (7) Policijski službenici GPBiH mogu djelovati izvan teritorije BiH ako su ovlašteni za to bilateralnim ili multilateralnim međunarodnim sporazumima.
- (8) GPBiH može učestvovati na međunarodnim sastancima i imenovati oficire za vezu.

## V - PRELAZNE I ZAVRŠNE ODREDBE

### Član 21.

#### **Privremeno sjedište GPBIH-a**

Dok se ne osigura sjedište na lokaciji Aerodrom Sarajevo, GPBIH ima privremeno sjedište u Istočnom Sarajevu.

### Član 22.

#### **Imenovanja**

- (1) Postupak imenovanja direktora, zamjenika direktora i pomoćnika direktora počinje po stupanju na snagu ovog zakona i bit će okončan najkasnije u roku od šest mjeseci od dana stupanja na snagu ovog zakona.
- (2) Imenovanja iz stava 1. ovog člana stupaju na snagu prvog dana nakon isteka perioda od šest mjeseci od dana stupanja na snagu ovog zakona.
- (3) Izuzetno od člana 14. stav 3. ovog zakona, za prvo imenovanje pomoćnika direktora, kandidati za taj položaj ne moraju ispunjavati uslov od tri godine rada u činu glavnog inspektora.

(4) Osoba, koja je u trenutku stupanja na snagu ovog zakona na položaju direktora i načelnika GPBiH, nastavlja vršiti svoje dužnosti na tom položaju do imenovanja novog direktora.

(5) Osobe, koje su u trenutku stupanja na snagu ovog zakona na položajima zamjenika direktora, nastavljaju vršiti svoje dužnosti na tom položaju do imenovanja novog zamjenika direktora.

(6) Osoba, koja je u trenutku stupanja na snagu ovog zakona na položaju šefa osoblja, nastavlja vršiti svoje dužnosti na tom položaju do imenovanja novog pomoćnika direktora.

(7) Do isteka perioda iz stava 2. ovog člana, osobe iz st. 3., 4. i 5. obavljaju poslove i nadležnosti po ovom zakonu.

#### **Član 22a.**

##### ***Mandat imenovanih lica***

(1) Mandat lica koja na dan stupanja na snagu ovog zakona, obavljaju funkcije direktora i zamjenika direktora, ne može trajati duže od perioda koji je propisan članom 14. stav (1) zakona koji je važio prije stupanja na snagu ovog zakona.

(2) Mandat licu koje na dan stupanja na snagu ovog zakona obavlja funkciju pomoćnika direktora traje do isteka mandata na koji je imenovan.

(3) Trajanje mandata licima iz stava (1) i (2) ovog člana računa se od dana kada su direktor, zamjenik direktora i pomoćnik direktora preuzeli svoje dužnosti.

#### **Član 23. (izbrisan)**

##### **Član 23a.**

##### ***Donošenje Pravilnika i primjena propisa***

(1) Pravilnik o izmjenama i dopunama Pravilnika biće donesen u roku od 60 dana od dana stupanja na snagu ovog zakona.

(2) Selekcija, školovanje i stručno usavršavanje kadeta koje je počelo prije stupanja na snagu ovog zakona, sprovodiće se prema odgovarajućim propisima GPBiH, koji su bili na snazi do donošenja ovog zakona.

(3) Do usvajanja odgovarajućih propisa GPBiH primjenjuje propise donesene prema Zakonu o GPBiH u mjeri u kojoj ti propisi nisu u suprotnosti s ovim zakonom i Zakonom o policijskim službenicima Bosne i Hercegovine.

Član 24.

**Prestanak važenja prethodnog zakona**

Danom stupanja na snagu ovog zakona prestaje važiti Zakon o državnoj graničnoj službi Bosne i Hercegovine ("Službeni glasnik BiH", broj 19/01), kao i propisi i odluke doneseni u skladu s tim zakonom.

Član 25.

**Stupanje na snagu**

*Ovaj zakon stupa na snagu osmog dana od dana objavljivanja u "Službenom glasniku BiH".*

PS BiH broj 111/04

21. oktobra 2004. godine

Sarajevo